

La nova constituziun evangelica vegn avant il pievel

Il cussegl grond evangelic ha deliberà la nova constituziun per mauns da la votaziun dil pievel

■ (cp) Il cussegl grond da la baselgia evangelica dal Grischun ha deliberà la nova constituziun per mauns da la votaziun dal pievel che ha lieu la primavaira proxima. I giaja per salvar il patrimoni istoric e da garantir che las valurs fundamentalas vegnian era dadas vinavant a las genereaziuns futuras, ha accentuà il parsura dal cussegl grond evangelic, deputà *Walter Grass*, en sia allocuziun presidiala.

La nova constituziun

La tractanda principala da la sesida dal cussegl grond evangelic è stada la revisiun da la constituziun da la baselgia reformada dal Grischun. La radunanza ha già da tractar 67 artitgels ed in grond dumber da propostas or dal ravugl da las delegadas e dals delegads. La constituziun persula na possa dentant betg stgaffir veta ecclesiastica, ella possa dentant stgaffir las cundiziuns e premissas da partenza favuraivlas per che quellas possian sa sviluppar, ha punctuà il president da la cummissiun predeliberanta, deputà *Ueli Bleiker*. Il sboz preschentà saja modern e manaiel al pievel. Ella haja la finamira da garantir er en l'avegnir l'abiltad d'acziun da la baselgia evangelic-reformada dal Grischun.

Cooperaziun indispensabla

Da nov è fixà en la constituziun nova che las singulas plaivs pon furmar unitads pli grondas ed era trair a niz meglier la vasta purschida.



Il deputà Ueli Bleiker ha presidià la cummissiun predeliberanta per la nova constituziun da la baselgia evangelica.

FOTO S. HÜGLI

En las novas regiuns pastorales duai daventar pussaivel quai ch'ina singula plaiv pitschna na po betg far senza per mancanza da resursas finanzialas e persunalas. Ulteriuras novaziuns pertutgan il commembradi, ils meds democratics da cundecisiun e las competenzas dals organs da surveglianza.

Per discussiuns entaifer il ravugl dals delegads ha per exempel la dumonda schi dovria supplementarmain tar l'evangelic da Jesus Cristus ina menziun da la Trinitad en la constituziun. Ina minoritad ha pretendì ch'ìls diacons socials vegnian elegids vinavant da la radunanza da las raspadas. Nundispitaivla è stada l'inten-

ziun che la baselgia cantunala evangelic-reformada duai restar vinavant ina baselgia dal pievel.

Laud e critica

Sper bler laud hai era dà critica. *Romedi Arquint* ha manchentà en il sboz las visciuns. El avess giavischà dapli solidaritad

tranter las raspadas reformadas cun introducir in pe da taglia uniftgà per tut las plaivs u da rinforzar las singulas plaivs enstagl d'introducir regiuns ecclesiasticas. «La pli bella visiun na vala dentant nagut sch'ella na vegn betg acceptada d'ina maioritad», ha respundì *Frank Schuler* che ha represchentà il sboz dal cussegl-baselgia. Schuler menziuna dentant er che l'idea d'in pe da taglia uniftgà saja stada ina part integrala dal sboz preliminar che haja bunamain periclità la revisiun da la constituziun da l'onn 2011.

Contrarri èsi stà questa giada. Il sboz purifitgà da la constituziun ha cuntanschì in resultat glischant en la votaziun finala, el è numnadamain vegnì approvà dals preschents senza ina solia cuntervusch. Uschia è preparada la via per il proxim pass. Il pievel protestant dal Grischun vegn a pudair decider davart la nova constituziun a l'urna. La votaziun duai probabel avair lieu il zercladur da l'onn proxim.

Ultra da la constituziun ha il parlament evangelic era deliberà il preventiv da la cassa evangelica chantunala. Il budget per 2018 quinta cun expensas da 10,9 milliuns e cun in deficit dad 83 600 francs. En quel connex ha la radunanza era sancziunà la proposta da stgassar reserves en l'autezza da 690 000 francs. Resguardà en il nov budget han ins era la decisiun prendida dal cussegl grond il december 2016 da reducir il pe da taglia da persunas giuridicas da 10,5 sin 10 per-schient.